

BABYOR NI MALAKI

Murung'agen e Re Ke Babyor Ney

Fare Babyor ni Malaki e ni yoloy nga tomuren ni kan toy fare Tempel bayay, ko duw ni gonapan 500 u m'on ndawori yib Kristus. I weliy Malaki ni profet ngak e pi prist nge girdi' ni ngar ted bayay nga tagil' ferad yul'yul' ko fare m'ag ni ngongliy Got u thilrad. Ya i par e girdi' rok Got nib kireb pangirad ma bkireb rogon e pigpig rorad ngak Got. Pi prist nge girdi' e ur ban nixed Got ni bochan e da ur pi'ed ngak e pin'en ni susun e ngu'ur pi'ed ngak, ma da ur folgad ko thin rok. I Somol e bayi gechignag e girdi' rok me mat'aw nagrađ ngak, ma u m'on ni nge yib ma bayi pi' e mol'og rok nge fal'eg rogon e kanawo' me weliy ngak e girdi' murung'agen e m'ag rok Somol.

Gathon e Re Ke Babyor Ney

Pi denen rok yu Israel 1:1—2:16

Pufthin rok Got nge wurengan' 2:17—4:6

¹ Ba'aray e thin ni pi' SOMOL ngak Malaki ni nge weliy ngak piyu Israel.

T'ufeg rok SOMOL ni fen yu Israel

² Be ga'ar SOMOL, "Gubin ngiyal ni gimed bt'uf rog."

Miyad fulweg nra ga'ar gad, "U rogon ni kam dag ngomad ni gamad bt'uf rom?"

Me fulweg SOMOL ni ga'ar, "I Esau nge Jakob e ruw i walag ni pumo'on, machane ba t'uf Jakob

rog nge pi'in owchen, ³ ma dabug Esau nge pi'in owchen. Kug kirebnag e binaw rok Esau ni go' burey kug pi' e gi binaw nem ngak e gamanman ni malboch."

⁴ Yu Edom, ni yad e pi'in owchen Esau, e fa'anra lungurad, "Pi binaw rodad e ka ni kirebnag, machane bay da ngongliyed nge sul nga rogon," machane fulweg rok SOMOL ngorad e be ga'ar, "Ngani pagrad ngar muruwliyed, ya bay gu sul ngay nggu kirebnag bayay. Ma bayi yog e girdi' fithingan e pi binaw nem ni Binaw Nib Kireb, ma ku bay ntunguy fithingrad ni, 'Fare nam ni bay i par SOMOL nib damumuw ngorad ndariy n'umngin nap'an.' "

⁵ Girdi' nu Israel e yad ra guy e ran'ey nga owcharad, ma bay ra ga'argad, "I SOMOL e rib gel gelngin ma ku errogon u wuru' e nam nu Israel!"

SOMOL ni puwan' ngak e pi prist

⁶ I SOMOL ni Gubin ma Rayag Rok e be ga'ar ngak e pi prist, "Pi'in bitir e yad ma liyor ko gal labthir rorad, nge pi tapigpig e yad ma liyor ko pi masta rorad. I gag e chitamangimed, ere mangfan ni damur liyorgad ngog? Dubmed gag, ma ke chiney ma gimed be fith ngog ni gimed be ga'ar, 'Uw rogon ni dubmad gur?' ⁷ Ba'aray rogon, bochan e gimed be maligachnag e ggan nde fel' u daken e altar rog. Ma aram e gimed be fith ni be lungmed, 'Uw rogon ni dagur ted fam?' Bay gog ngomed ni be m'ug e fananikan romed ko altar rog. ⁸ Ngiyal' ni gimed ra fek i yib ba gamanman nib malmit ara ba m'ar ara ba mugutgut ni ngam maligach nighed ngog, ere

gimed be leamnag ni dariy ban'en nib kireb riy? Ere mpi'ed ba gamanman ni aram rogon ngak governor ngam guyed! Gur ra felfelan' ngomed me gol ngomed?"

⁹ Gimed e pi prist, mu fithed Got ni nge gol ngodad ngam guyed. Ya dabi fulweg taban e meybil romed, ma gimed e kireb romed. ¹⁰ I SOMOL ni Gubin ma Rayag Rok e be ga'ar, "Gu be athapeg ni mang e ning bigmed mban e Tempel, ya nge dab kumu k'oreged e nifiy nib mm'ay fan u daken e altar rog. Ya kam kirebgad u wun'ug; dabi fel' u wun'ug e pi maligach ni gimed be fek i yib ngog. ¹¹ Girdi' u gubin yang u fayleng e yad be liyor ngog. Gubin yang ni yad be urfiy e *incense* riy ngar pi'ed ngog ma yad be pi' e tin ni bfel' e maligach. Yad gubin ni yad be liyor ngog! ¹² Machane gimed e dakumur liyorgad ngog, ya ka mogned ndariy fan e altar rog, ma kigmed be pi' e tin ndubmed e ggan u daken. ¹³ Ke lungumed, 'Ke chalabdad ko pin'ey ni urngin!' Ma gimed be tartareg lechnge p'ethungmed ngog. Gimed ra maligach ngog me pi' bigimed ba gamanman ngog ni iring, ara reb nib marwoth ara bm'ar. Gimed be finey nra fel' u wun'ug e pin'nir? ¹⁴ Nge kireb wa'athan e en nra sasaliyeb nge li' ba gamanman ni gathi rib fel' nge pi' ngog ni maligach, ma bay reb e gamanman ni bfel' u fithik' e gamanman rok nike micheg ngog ni nge pi' ngog. Ya gag e pilung ni ga', girdi' nu gubin e nam e bay madgug u wun'rad."

2

¹ I SOMOL ni Gubin Ma Rayag Rok e ga'ar ko pi prist, "Ba'aray e n'en ni ngam rin'ed: ² Thingar

mu liyor gad ngog ko ngongol romed. Fa'anra dab motoyilgad ko n'en ni gu be yog, ma aram e bay gu bucheg wa'athmed. Bay gu gagiyeagnag nge dabki fel' rogomed ko pin'en ni bfel' ni be yag ngomed. Kug mu' i gagiyeagnag ni nge kireb, ya damur ted ngan'med e tin kugog ni ngam rin'ed. ³ Bay ggechig nag pifakmed mug gichiy owchemed nga fithik' i t'ay e pi gamanman ni gimed ma maligach ngay, bay gu n'agmed nga fithik' e tar. ⁴ Ma aram e bay mu nanged ni gag e kugog e re bugithin ney, ya nge par fare m'ag romad e pi prist, ni aram e pi'in owchen Levi ni dabi math'.

⁵ "Ulan fare m'ag rog e gu micheg ngorad e yafos nge fel' rogon, ma irera' e n'en nug pi' ngorad, ya nge yag nra ted fag. Pi rran nem e ur ted fag mi i par madgug u wan'rad. ⁶ Ma tin nib mat'aw e ur filed ko girdi', ma gathi n'en nib kireb. Ma ug pired ni bfel' thilmad; gathi kemus ni go'yad e ur rin'ed e tin nib mat'aw, ya ku'ur ayuweged bokum e girdi' ni ngar taleged i rin' e tin ba kireb. ⁷ Ri maruwel rok e pi prist ni ngar filed e tin riyul' u murung'agen Got. Girdi' e susun e ngranod ngorad ngar filed e tin nib m'agan'ug ngay, ya yad e pi tafek thin rok SOMOL ni Gubin ma Rayag Rok.

⁸ "Machane gimed e pi prist e kam pi'ed keru'med ko bin nib mat'aw e kanawo'. Machib ni gimed be tay e ke waliy bo'or e girdi' kar ngongliyed e kireb. Kam th'abed fare m'ag ni gu ngongliy u thildad. ⁹ Ere bay gu gagiyeagnag nge dabuymed e girdi' nu Israel, ya damur folgad ko tin lanin'ug, ma fa'an bay mmachib niged e girdi' rog, ma damur ayuweged yad ni ta'ab rogon."

Girdi' nda ur yul'yul'gad ngak Got

¹⁰ Gathi gadad gubin ni ta'reb e chitamangidad? Gathi ta'ab Got e sunmiydad ni gadad gubin? Ere mangfan ni gadad be th'ab e tin ni kad micheged ngodad ni ngad rin'ed, ma mangfan ni gadad be fananikay fare m'ag ni ngongliy Got u thilrad e pi chitamangidad kakrom? ¹¹ Girdi' nu Judah e kar th'abed e n'en nra micheged ngak Got kar ngongliyed ban'en nrib kireb u lan yu Jerusalem nge ga'ngin fare nam. Kar ta'ay niged fare Tempel nrib t'uf rok SOMOL. Pumo'on e kar le'engiyed e ppin ni yad ma meybil ngak yugu boch e got. ¹² Manga yigi chuweg SOMOL u fithik' e girdi' rok nu Israel e en ni be rin' e pin'ey, ma dabki pagrad ngar'uned ko maligach nma pi e re nam nem ngak SOMOL ni Gubin ma Rayag Rok.

¹³ Ku ba'aray reb e ban'en ni gimed be rin'. Kam lumach niged e altar rok SOMOL ko lu' ni gimed be yor ma gimed be dololoy', ya dakir fek e pi maligach ni gimed be fek i yib ngak. ¹⁴ Ma gimed be fith ko mangfan ni dakir fel e maligach romed. Bochan e manang ni kam th'ebed e michmich ni mu ted ngak pi le'engimed ni mu mabgol gad ni ki gimed bpagel. I ir chagilem, ma ka mu th'ab e n'en nim micheg ngak, ni yug aram rogon nim micheg u p'eowchen Got ni ga ra yul'yul' ngak. ¹⁵ Gathi Got e taymew ni kam ta'ab dowefgow ma ta'reb lanin'mew? Mangfan ni yodrom nag? Bochan e ngam diyen niged e bitir, ni bitir nriyul' ni girdi' rok Got. Ere mu ted u gil' e n'en nim micheged ngak pi le'engimed ni dabi thil. ¹⁶ I SOMOL ni ir e Got rok piyu Israel e be ga'ar, "Kug dabuy

e mabgol ni be wear. Kug dabuy ni bayi n'en me ngongliy bigimed e binem e pa' nrib kireb ngak le'engin. Ere nge bigimed me ayuweg ir, ma dab kum thiliyeged e tin ni kam micheged ni kamogned ni bay um pired ni gimed ba yul'yul' ngak pi le'engimed."

Rofen ni nge taw e pufthin e ke chugur

¹⁷ Ke aw parwon SOMOL ko thin romed. Machane be lungumed, "Ni uw rogon ni kug aw nigned parwon?" Ya gimed be ga'ar, "I SOMOL ni Gubin ma Rayag Rok e be leamnag ni urngin e girdi' ni be ngongliy e kireb e bfel'; ya ba'adagrad." Ara gimed be fith ni be lungumed, "Bu uw fare Got ni yima leamnag nma rin' e tin nib mat'aw?"

3

¹ Fulweg rok SOMOL ni Gubin ma Rayag Rok ko re bugithin ney e be ga'ar, "Bay gu l'oeg ba tafek thin rog nge ngongliy rogon e kanawo' rog. Ma aram e fare SOMOL ni gimed be changar nag e bay mu gin gad ma keyib ko Tempel rok. Fare tafek thin ni gimed be finey ni mang e yug mu guyed e bayi taw ni nge weliy murung'agen e m'ag rog."

² Machane mini' e rayag rok ni nge lubeg e re rran nem ni bay yib riy? Mini' e rayag rok ni nge par nib fos ko ngiyal' nra yib i m'ug? Ir e bod rogon ba soap nib gel, fa bod e nifiy nma ranran nag e wasey nge chuweg e chabung u fithik'. ³ Ra yib ni nge pufthin ni bod be' ni nge chuweg chabungen me machalbog nag e silber. Bod be' nma maruwel ko wasey nma chuweg chabungen e silber nge gol, e aram rogon fare tafek thin rok SOMOL nra

machalbog nag e pi prist, ya nge yag nra feked i yib ngak SOMOL e tin nib mat'aw e maligach.

⁴ Ma pi maligach ni bayi pi' e girdi' nu Judah ngu Jerusalem ngak SOMOL e bayi fel' u wan', ni bod rogon ni ur rin'ed kakrom.

⁵ Be ga'ar SOMOL ni Gubin ma Rayag Rok, "Bay gub gu m'ug u fithik'med ni nggu pufthin, ma bay gu welthin nib togopluw ngak e pi'in yad ma pig, nge pi'in yad ma par e girdi' ni gathi mabgol rorad, nge pi'in yad ma lifith l'ugunrad u tafen e puf oloboch, nge pi'in yad ma ban nag e pi'in yad be maruwel rorad ngu'ur pi'ed puluwrad ni buch'uw, nge pi'in yad ma gafgownag e pi'in ke yim' figirngirad, nge pi'in kanim' rorad, nge girdi' nu bang, nge gubin e pi'in ndarir ted fag."

Ta'ab guruy u ragag guruy ban'en ni yibe pi' ngak SOMOL

⁶ "I gag e SOMOL ma ri dab gu thil. Ere gimed e pi'in owchen Jakob e dawor mmalog gad e chiney.

⁷ Gimed bod e pi chitamangimed ni kakrom, ya kam pi'ed keru'med ko pi motochiel rog daku-mur folgad riy. Mu chealgad ngam sulod ngog, mu gu cheal nggu sul ngomed. Machane gimed be fith ni be lungmed, 'Mang e thingar gu rin'ed me yag ni ngug chealgad nggu sulod ngom?' ⁸ Nggu fithmed, gur bmat'aw ni nge mororo' be' ngak Got? Dangay, machane gimed be mororo' ngog. Ma gimed be fith ni be lungumed, 'Uw rogon ni kug mororo' gad?' Ko ragag e pasent ko tin bay romed nge tin ngam ognaged. ⁹ Ke buch wa'athmed ni gimed gubin, ya girdi'en e re nam ney ni polo' e yad be mororo' rog. ¹⁰ Mu feked i yib nga Tempel, ni

urngin u gubin, ragag e pasent ko tin ba' romed, ya nge yib e ggan nga naun rog. Mu sikeng niked gag, mi gimed guy ni bay gu bing mban e tharmiy mu gu pu'og nga dakenmed e pin'en ni bfel' nge pag e fol riy. ¹¹ Ma aram e dab kug pag e pi chachangag nge longuy e woldug romed, me par yungi milay' romed ni *grape* nike sug ko *grape*. ¹² Ma aram e girdi'en urngin e pi nam e bay rogned ni gimed ba felan', ni bochan e bayi par e nam romed ni ba nam ni bfel' ni ngu'un par riy."

I Got ni micheg nra runguy e girdi'

¹³ Be ga'ar SOMOL, "Kam thibthib niked gag, machane ke lungumed, 'Mang e ku gogned ni murung'agem?' ¹⁴ Ke lungumed, 'Mm'ay fan e pigpig ni ngan tay ngak Got. Dakuriy fan ni ngad rin'ed e tin be yog, fa da guyed rogon ni ngad daged ngak SOMOL ni Gubin ma Rayag Rok nike kolngan'dad ko tin kad rin'ed. ¹⁵ Ya gadad be guy ni pi'in yad ba tolngan' e yad ba felfelan'. Ma pi'in yad be ngongliy e kireb e gathi kemus ni be yo'or ban'en rorad, machane ku yad be sikengnag e gumaen' rok Got ko kireb ni yad be ngongliy ma der buch ban'en rorad.' "

¹⁶ Ma girdi' ni bay madgun SOMOL u wun'rad e ur welthingad ngorad, ma be motoyil SOMOL ngorad me rung'ag e thin ni yad be yog. Bay ba ke babyor rok ni kan yoloy ngay murung'agen e pi'ini bay madgun SOMOL u wun'rad ma yad be tayfan. ¹⁷ Be ga'ar SOMOL ni Gubin ma Rayag Rok, "Bay ra manged e tirog e girdi' ko chirofen ni bay gu maruwel, ma bay ra pired ni kari mil suwrad ngog. Bay gu runguyrad ni bod e gal labthir ni yow

ma runguy pifakrow ni yad be pigpig ngorow.
18 Girdi' rog e bay kur guyed bayay e n'en nib
thil u thilin e pi'in yad mmat'aw nge pi'in yad be
ngongliy e kireb, ngu thilin e en ni be pigpig ngog
nge en nder pigpig ngog."

4

Fare rran rok SOMOL ni bayyib

1 I SOMOL ni Gubin ma Rayag Rok e be ga'ar,
"Nap'an ni bayi taw ko fare rran ma bayi mo'oruf
e pi'in tolngan' nge girdi' ni kireb e leam rorad ni
bod e pan nike mlik'. Rofen nem e yad ra mo'oruf
ni dariy bochyang rorad nra magay. 2 Machane
gimed e pi'in gimmed be fol rog e rayib gelngig nma
ayuwegey nga dakenmed ni bod ram'en e yal',
me gol nagmed. Ra puf mat'awmed ma gimmed ra
felfelan' ni bod rogon pifak e garbaw nni bing e
chum rorad ngranod nga wuru'. 3 Bay mu gelgad
ngak e pi'in nib kireb, ma bay ra boded e fiyath u
tan e rifrif u aymed ko rofen ni ba'aram ni bay gu
maruwel.

4 "Mu leam niged e pin'en ni i machibnag e
tapigpig rog i Moses, ni fapi motochiel nge fonow
ni gu pi' ngak u daken e Burey ni Sinai ni fan ngak
urngin e girdi' nu Israel ni ngar folgad riy.

5 "Machane u m'on ndawori taw e re rran nem
rok SOMOL, ni aram fare rran ni ba ga' ma ba gel
e gafgow riy, e bay gu l'oeg fare profet i Elijah nge
yib ngomed. 6 Ma aram e bayi fulweg e pi matam
nge pi bitir nga ta'bang bayay. Ma fa'anra dangay
ma gu ra yib nggu kirebnag e nam romed."

Bible Ni Thothup
The Holy Bible in the Yapese language of the
Federated States of Micronesia

Copyright © 2007 Bible Society of Micronesia

Language: Yapese

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-12-21

PDF generated using Haiola and XeLaTeX on 11 Nov 2022 from source files dated 30 Nov 2021

37b6628b-b71d-5df3-af33-fc1d4dd69788